





Niuspepa bilong ol Papua Niugini stret

Wantok ^{12t}



Pedroza



VS
Aba
PES 24

Gavman laik opim wanpela

Pilai laki Laki

Wanpela man o meri inap winim 30,000 kina sapos pilai laki tiket, ol i kolim 'Loteri' i go het long Is Niu Briten. Edministretiv Seketeri bilong Is Niu Briten Provinsal Gavman, Mista Nason Paulius i tok olsem.

Mista Paulius i tok, Is Niu Briten i laik kirapim dispela pilai laki long wanem em bai kamapim planti mani long go insait long Provinsal Gavman.

Em i tok dispela kain pilai laki long ol tiket bai i no inap kamapim planti wari. Em i tok sapos dispela pilai laki i kirapim planti wari yumi no inap kirapim long dispela Provins.

Mista Paulius i tok, Provinsal Gavman i ting long salim loteri tiket long ol kain ples olsem ol Stua, Sevis Stesin, Buk Stua na ol nara-pela hap.

Em i tok ol pipel i baim tiket i inap winim K2.00 i go inap long K5,000. Na bikpela prais em 30 tausen kina olgeta.

Minista bilong Provinsal Gavman, Pater John Momis i tok olsem. Pastaim Palimen i mas tok orait long senisim dispela lo ol i kolim "Geming Akt". Palimen i orait long senisim orait dispela kain pilai laki ol i kolim 'loteri' i ken kamap. Na Provinsal Gavman i ken kirapim pilai laki long loteri tiket long Provins bilong ol.

Tasol Pater Momis i tok ol pipel i mas wok long painim mani. Long tingting

bilong em, ol pilai laki olsem loteri, i no gutpela rot long kirapim kantri.

Dispela nupela lo tu bai pasim ol loteri bilong Australia na ol arapela kantri long kam insait long PNG.

Minista bilong Fainens, Mista Barry Holloway i tok em bai i no inap mekim wanpela samting long pasim ol Provins long kirapim pilai loteri tiket. Tasol ol i mas lukluk gut pastaim long ol lo long kirapim pilai laki tiket long Provins.

Em i tok ol save-man bilong lo bilong Nesenel Gavman i toktok nau wantaim ol save man bilong lo bilong Is Niu Briten Provinsal Gavman. Ol i toktok nau long ol lo i pasim ol Provinsal Gavman long kirapim dispela pilai laki tiket.

Direkta bilong Sosol Wok bilong Lutheran Sios long Lae, Rev. Fred Scherle i tok ol i no laik lukim pipel bilong PNG i yusim mani bilong ol long pilai loteri tiket.

i go moa long pes 2

Smatpela man i save baim sea long Invesmen Koporesen

Sapos yu laik save moa rait i kam long

Investment Corporation of Papua New Guinea

P. O. Box 155, Port Moresby.





DIVELOPMEN!

Gavman oltaim i sot long mani long mekim wok bilong ol. Olgeta kaunsila bilong ples, olgeta Memba bilong Provinsal Gavman, na olgeta Memba bilong Palimen i save gut long dispela samting. Gavman i gat laik long helpim planti ol man tasol mani i sot.

Ating dispela tingting tasol i kirapim ol sampela lida bilong yumi long opim rot long pilai laki. Tasol Gavman i mas skelim gut dispela tingting pastaim. Nogut ol opim rot na bihain i gat planti trabel i kamap.

Mi laik stori liklik pastaim. Yumi ken tingting bek long ol lo bilong bosim dring. Pastaim Gavman i opim rot tru na bihain planti trabel i kamap. Long dispela tasol ol planti komuniti lida i kros long Gavman na ol i mekim mekim inap Gavman i pasim rot liklik.

I wan kain long pilai kas. Pastaim Gavman i pasim nating rot long pilai kas. Bihain planti toktok i kamap na Gavman i wokim nupela lo long opim pilai kas.

Na tu nogut Gavman i kirap na wokim wanpela samting na ol i no save gut long tingting bilong ol manmeri. Nogut ol i bihainim tingting bilong wan wan man na ol i no tingting gut long ol arapela man.

Wanem Gavman, Nesenel o Provinsal Gavman, i laik opim pilai laki ol i mas askim ol komuniti pastaim. Komuniti i orait ol i ken tingting long opim. Tasol moa beta ol i askim ol lida insait long ol komuniti, ol wumens klap, ol sios, ol welfea opisa. Em ol dispela man tasol bai i hat wok long karim ol hevi i kamap long pilai laki.

Ating nem bilong dispela pilai i no gutpela tumas. Long wan wan man i pilai laki. Long bikpela lain em i pilai sori tasol.

I kam long pes 1

Em i tok long dispela kain pilai ol pipel i no mas ting olsem ol bai win olgeta taim. Wan wan taim tasol sapos ol i laki bai ol i win.

Rev. Scherle i tok long Morobe Provins planti moa pipel nau i save pilai laki. Na tu planti meri i save pilai.

Olsem ol i no gat mani long baim kai-kai bilong pikinini.

Siaman bilong Melanesian Kaunsil ov Sios, Rev. Joshua Damoi, i tok pilai loteri i no gutpela samting. Em bai kamapim planti wari long PNG.

Ben Skorplo

Ol Kaugere Yut Wok Bung



Photo i soim ol Kaugere, Mosbi Yut Grup taim ol i wok long stretim ples long staim sampela wok gaden. Namel long ol, pasim aiglas, em lida bilong ol.

Ol yangpela pipel bilong Kaugere, Mosbi i kamapim pinis K250 long kirapim ol kain kain wok bilong helpim komuniti bilong ol i go het. Ol i kamapim dispela mani long namba 3 de long Oktoba. Mani bai i go long helpim ol long opim wanpela Tret Stua, wokim ol sampela gaden na kirapim wanpela bisnis bilong kisim pis long solwara.

Welfea Opisa bilong Kaugere, Mista Timothy Raula i tok ol yut i bin paitim toktok pinis wantaim 4-pela Minista bilong Gavman.

Mista Raula i tok ol yut bai askim Eben Afeas long K21,000 long helpim ol long kirapim dispela wok.

Namba bilong ol yangpela i moa long 300. Olgeta i nogat wok na planti i no pinisim komuniti skul. Ol yut i bilong Kerema, Koiari na Goilala. Krismas bilong ol i stat long 7 na i go inap long 25.

Mista Raula i tok em i amamas tru long sindaun na helpim ol yangpela long ol dispela kain wok.

NIUS - NIUS - NIUS - NIUS - NIUS - NIUS

☆ NUPELA OPIS LONG AFRIKA - Nesenel Gavman i tingting nau long opim wanpela nupela opis long Dar-es-Salan Tanzania, Afrika.

☆ OPISA BILONG RASIA - Tupela S ina Opis bilong Rasia i kamap pinis long PNG. Ol i laik kisim tok orait long Gavman long yusim wanpela Sip bilong ol long stadi long ol pis long PNG.


Gavman i tok orait long ol long kam na lukluk long ol we PNG i ken mekim wok long painim pis.

☆ TAMBU LONG BRUKIM BODA - Gavman i tambuim pinis olgeta man long go i kam na brukim boda mak bilong PNG na Indonesia. Em long wanem i gat wanpela ripot olsem wanpela sik ol i kolim "Kolera" i kamap pinis long Irian Jaya. Sik Kolera em i wanpela sik i mekim man i traut, pekpek wara, pasim pispis na bihain em i dai. Sik Kolera i kamap taim man i dring wara nogut.

☆ LUMI HAI SKUL - Lumi Hai Skul long Sandaun Provins i kisim pawa pinis. Skul yet i wokim wanpela projek long bringim pawa i kam insait long skul. Australia Hai Komisn, Defens Fos, Rotary Klab na sampela lain bisnismen bilong Is na Wes Sepik i helpim skul long baim masin na olgeta arapela samting bilong kamapim pawa. Het Masta, Mista Ian Bagley i tok dispela em i soim olsem skul yet inap kirapim na pinisim sampela wok long helpim skul go het.

☆ PASIM WOK BILONG GAVMAN - Lida bilong Oposisen, Mista Iambakey Okuk i tok, planti Minista bilong Gavman i wok long mekim ol kain kain toktok. Olsem planti bikpela divelopmen i no go het long PNG. Em i tok bipo Gavman bilong Somare i gat gutpela sindaun na ol memba i wan bel. Tasol nau nogat.

TAMBU TORO



Nesenel Niuspepa long Tok Pisin
Nius i kamap long olgeta wik

Editorial	Advertising
P.O. Box 1982	Australia
Boroko	Central Media Sales
Ph. 25 2500	Sydney
Telex NE 22213	Ph. 436 1000
	Telex AA23211
Advertising	Pe bilong wan yia
P.N.G.	Mosbi K9.50
Ph. 25 2500	P.N.G. - K13.00

Ol Pablik Seven Kros

Gavman i tok em i no inap harim tok bilong ol Pablik Seven long ol planti askim bilong ol.

Planti ol Pablik Seven i gat belhat tru. Long wanem pe bilong ol haus bilong Gavman i go antap tru. Tasol, Gavman i tok, mipela i no ken lukautim ol Pablik Seven olsem pikinini.

Na taim Fainens Minista, Mista Barry Holloway, i givim baset long Novemba 6, em i tok strong long Gavman i no inap apim pe bilong ol Pablik Seven.

Em i tok "sapos Gavman i apim pe bilong ol Pablik Seven inap long 5 pesen tasol bai Gavman i lusim 10 milien kina olgeta. Tasol Gavmani gat planti bikpela wok i mas mekim bilong helpim ol pipel, olsem wok long rot, bris na ol arapela samting olsem. Olsem Gavman i no inap apim pe bilong ol."

Long yia 1980, Gavman i mas wokim nupela kontrak wantaim ol Pablik Seven.

Tasol Gavman no ken apim pe bilong ol. Gavman i ken apim liklik tasol. Dispela em bilong helpim ol bikos pe bilong olgeta samting i save go antap.

Planti wokman bilong Gavman insait long Papua Niugini i no amamas tumas taim Gavman i apim pe bilong ol haus bilong ol. Planti ol i tok bai ol i lusim

riplot em i kisim nau i soim olsem ol planti wokman bilong Gavman i no inap long baim nupela prais bilong ol haus.

Mista Mileng i tok olsem em i askim ol wokman bilong Gavman long no ken lusim wok bilong ol. Nogut bai wok bilong Gavman i go bagarap. Olsem PNG i no inap go het.

Namba tu Jenerel Sekreteri bilong PSA, Mista Kapai Aria, i tok dispela tingting bilong Gavman bai bagarapim tru ol wok bilong Gavman na kantri i no inap go het.

Pesman bilong Pablik Sevis Komisn bi-

long Gavman, Mista Ani Daugl i tok Gavman i dabolim pinis fotnait pe bilong haus. Sapos bipo yu baim haus long K15 long fotnait nau bai yu mas baim long K30 long fotnait. Em i tok gen bai pe i go antap inap long K40 long neks yia.

Ol Provinsal Gavman tu i gat bikpela wari tru long dispela nupela fotnait pe bilong ol haus. Premia bilong Is Nu Briten, Mista Henry ToBaining i tok Nesenel Gavman i no tingting gut long ol wokman bilong ol i gat bikpela famili. Sapos ol Pablik Seven i mas baim fotnait long bikpela mani bai ol i hangri na sik nabaut.

● A.R. Rumber

Nupela Baset

Gavman bai yusim 73.8 milien kina olgeta long ol kain wok insait long PNG long yia 1980. Long wik i go pinis, Nesenel Palimen i orait long Baset (we bilong skelim ol mani) bilong PNG long kibung bilong ol.

PNG yet i putim 307.3 milien kina i go insait long dispela baset. Australia i helpim long 182. milien kina olgeta. Gavman bai kisim narapela 12 milien kina olgeta long Beng bilong PNG long mekim kamap dispela baset bilong yia 1980.

Minista bilong Fainens, Mista Barry Holloway, long taim em i bringim dispela ripot bilong baset i go long Palimen i tok dispela baset i bilong mekim PNG i go het na redi long lukautim olgeta samting long taim bihain.

Long dispela baset Gavman bai lusim 187.7 milien kina long ol Gavman Depatmen; 117.9 milien kina long ol

Provins; 79.4 milien kina long ol bikpela wok bilong developmen; 36.4 milien kina long wok long lukautim ol rot na bris na haus; 34.1 milien kina long givim helpim na dinau long ol lain i mekim wok bilong Gavman (olsem El Kom); 6.3 milien kina long wok bilong Fainens; 5.5 milien kina long ol arapela liklik wok.

Baset bilong yia 1979 em i 535.4

milien kina. Baset bilong yia 1978 em 485.8 milien kina. Baset bilong yia 1980 i winim ol namba bilong mani Gavman i yusim long yia 1978 na 1979.

Tasol Lida bilong Oposisen, Mista Iambakey Okuk i tok namba bilong mani Gavman bai lusim long yia 1980 i soim olsem Gavman i no inap long mekim go het ol wok bisnis bilong PNG.

Mista Okuk i tok olsem baset i go antap long yia 1980 long wanem ol i apim prais bilong ol samting na tu ol i dinau planti. Baset i go antap tu long wanem Australia i givim planti helpim long mani insait long dispela baset em i tok.

Em i tok dispela i soim olsem Gavman yet i no inap long kamapim mani na em i wok long apim prais bilong ol samting insait long ol bisnis long kisim mani long ranim kantri.

● Ben Skorpio

Kaputin Lus

Bik Kot i no harim askim bilong olupela Minsita bilong Nesenel Plenin na Developmen, Mista John Kaputin.

Kaputin bai stap kalabus i nap long 12 Decemba.



Ol lain bilong Nesenel Sensus Ofis i wok long kisim nem bilong ol man bilong Kumun Viles, Is Sepik Provins. Ol i wok long traim ol kwesten ol i redim pinis bilong askim ol man long taim ol i wokim tru Sensus. Ol dispela lain hia i wok long traim ol kwesten tasol. Taim ol i traim pinis ol i painimaut olsem ol i mas senisim sampela kwesten pastaim na bihain ol i ken wokim sensus.



Maski Long Hapim Tok Ples Bilong Arapela Kantri

Dia Edita — Inap yu givim liklik spes spes long mi, na mi laik sapatim tingting bilong brata Bruce Mosong bilong Minyanda.

Kamap long Wantok long Namba 2871 long Oktoba 6 dispela yia 1979. Yes, long dispela kantri bilong yumi long PNG i gat tupela kain skul. Wanpela em i Inglis skul na arapela em i Tokples skul. Na planti yangpela man-meri ol i save skul long Inglis skul ol i save daunim mipela nogut tru long tokples skul. Ating ol i save tok Inglis na ol i ting olsem, mipela tasol i gat save, na tokples skul em i olsem pipia samting. Mi laik tok olsem. Wanem skul em i winim?

Tokples skul o tok Inglis? Yes, yumi i no ken kus pundaun long Inglis skul. Inglis em i tokples bilong arapela kantri. Em i no bilong yumi stret.

MERI NOKEN PILAI Soka

Dia Edita — Plis mi laik bai yu givim liklik spes na raitim tok save bilong mi.

Mi no hamamas tru long ol meri i pilai soka. Tasol em i gutpela tasol em i no gutpela tru long ai bilong ol man. Pilai bilong ol meri planti i stap, tasol ol i sot long pilai na ol i kam kisim pilai bilong man na pilai olsem wanem?

Mi pilim dispela na mi gat bikpela sem tru. Sapos wanpela man meri bilong yu em i pilai soka, orait yu harim, dispela meri em i maritim yu pinis na yu kamap olsem meri. Na brata yu no man moa nau nogat tru. Meri em i maritim yu pinis na kamap olsem meri laka?

Yupela ol meri i nogat pilai bilong yupela i stap? Basketbol, Netbol na ol arapela pilai. Tasol yupela i wanem samting na yupela i wok long painim pilai. Yu meri yu hukaut, yu no ken antap long ol man bilong yupela. Baibel i tok, "Yu mas aninit long ol man bilong yupela". Sapos yu senisim tok bilong God yu lukaut a? Meri Wantok?

Sapos wanpela man o meri yu laik bekim pas bilong mi, rait tasol i kam long Wantok Niuspepa. Sapos yu laik sapatim mi long dispela, em i orait tu. I no gutpela na yu laik krosim mi, yu ken rait tasol long Wantok Niuspepa. Tenkyu.

Fona Kasowa
E.S.P.

Sapos yu i go long ples bilong yumi PNG long wan wan ples na yu tok Inglis long papamama bilong yu. Bai tupela i tok Inglis o nogat? Mi ting i nogat tru.

Olsem na yumi i

no bagarapim tokples skul. Mi ting tokples skul em i helpim planti manmeri long ples, na kamapim gutpela sindaun long ples. Wantok, yu gat bikpela save long tok Inglis. Tasol mipela tu long tok ples skul

tu i lainim liklik tu askim mipela olsem.

Olsem na nogut yu ting mi wan.

Nogut yumi kus pundaun long tok bilong narapela kantri. Yumi mas skulim tupela tok pastaim. Inglis na tokples. Inglis em i namba wan o tokples em i nambawan? Gavman tu i mas skulim dispela tupela tokples Inglis na tokples skul tu.

Em tasol mi sapatim tingting bilong brata Bruce Mosong long Mainyanda D.T.P.S. Sapos yu gat wari orait raitim tasol long Wantok Nius bai mi lukim. Tenkyu.

Geyamukwi Kaukesa
Kaintiba Galp Provins.

Bekim Tok Long Yunifom

Dia Edita — Inap yu givim mi liklik spes mi laik bekim toktok bilong wantok ia, Samuel Kazmur bilong Lae, long Morobe Provins.

Yes, wantok, mi no hamamas long dispela tok bilong yu em yu tok. Watpo na ol plisman, ami ol i save werim yunifom na go long liv o holide? Samuel, a ting yu stap long bus ia olsem na yu

Dispela toktok bilong yu i bin kamap long Wantok Niuspepa long 2 de long mun Oktoba 1979. Mipela i save putim yunifom na go long liv o holide, long wanem mipela i gat risen olsem na mipela i save putim yunifom i go long liv o holide.

Sapos yu i gat ol brata o kandere bilong yu i stap long fos, orait yu tokim ol na bai ol i eksplenim long yu. Yu mas tingting gut na yu toktok egnensim long ol yunifom mipela save putim na go long ples. Mipela stap na yu stap, na yu kaikai gut na yu silip gut.

Mi wanpela memba bilong Fos, tasol nau mi stap long holide long bik ples karanas. Bekim pas, sapos yu laik. Tenkyu.

M. Dickson
Taurama Barracks

Famili Plenin

Dia Edita — Yes, mi laik yu givim mi liklik spes bilong mi long wari bilong mi.

Yes, mi laik sapatim toktok bilong Mr. Mathias Temby Angoram E.S.P. long presiden bilong Nes Asosiesen long P.N.G. Mis Jelilah em i tok.

Wok bilong femili plenin i mas go het long P.N.G. tasol mi ken tok olsem i tru o olsem dispela kain sut o marasin bilong stopim bel bilong meri i save bagarapim tru sampela. Marit o femili long dispela kantri.

Em i olsem taim ol meri i kisim dispela sut pinis ol i no mo wari long man bilong ol taim man bilong ol i lusim ol na i go long we long wok.

Na tu long ol yangpela meri i save kisim dispela marasin pinis ol i save i go tru long pasin pamuk bilong wanem ol i no wari bai wanem samting bai kamap long skin bilong ol, long kisim bel. Nau yumi lukim kain pasin bilong pamuk nau i kamap.

Bikpela tru long kantri bilong yumi PNG yes em tasol. Nau yu husat i laik sapatim toktok mi o yu husat i laik bekim toktok bilong mi o Mis Julilah yu laik bekim toktok bilong mi, em orait tasol mi hamamas tasol long harim. Em tasol.

Martin Kamun
Madang Taun

Pe Bilong Samting I Go Antap

Dia Edita — Inap long yu givim liklik spes long mi, na mi putim wari bilong mi long en, o nogat.

Wari bilong mi i go olsem. Mi save lukim sampela liklik samting yumi yet i save wokim long PNG yet.

Na olsem wanem na ol i save apim pe tumas long kain samting olsem: sop, tilip, bisket, kol dring olsem kokola drings na pinat bata.

Mi gat bikpela wari tru long ol dispela samting olsem, na mi laik askim yupela ol wokman bilong faktori na gavman yupela i ting olsem wanem na yupela i apim pe bilong ol dispela samting i go antap tumas.

Mi amamas long em, tasol mi tingim ol papamama long ples, long wanem ol i save painim liklik mani long maket na kopi, tasol ol i gat planti

wok olsem, na ol i save putim i go long em, na ol yet i no gat, na ol i ting long baim koldring samting tasol pe i antap tumas.

Yes, sapos yu husat wokman bilong faktori o gavman i laik bekim askim bilong mi, o yu laik egnensim mi, o yu husat brata o susa i laik sapatim mi orait yu ken rait tasol i go long Wantok Niuspepa na bai mi ken lukim. Tenkyu.

G.L. Abram
Mainyanda, Bulolo.

Sikuriti Paitim Spak Man

Dia Edita — Plis putim dispela toktok bilong mi long Wantok Niuspepa. Mi save lukim ol hotel na ba insait long Pot Mosbi ol i save kisim ol man na wok olsem sikuriti.

Em ol Hailans man tasol ol i save wok olsem ol sikuriti long hotel na ba long Pot Mosbi siti. Na sapos ol man bilong Hailans dring na brukim botol or pait insait long hotel. Tasol ol sikuriti i no nap long kam long rausim ol o ol i kam na tok isi tasol long ol.

Tasol mi save lukim, sapos man ol narapela ples Morobe, Madang, Is Niu Britin, Not Solomon, Kimbe, Niu Ailan o Papua, ol i spak na pait o brukim botol bia, ol Hailans Sikuriti kam na paitim ol na kikim ol, na rausim ol olsem pik, dok i go ausait.

Tasol sapos ol Hailans yet nogat tru, bai ol i no nap paitim ol na kikim ol na pusim ol i go ausait. Nogat tru, mi yet man bilong dring bia na mi save lukim tru long ai bilong mi, olsem na mi raitim dispela leta. Sapos yu laik sapatim pas bilong mi, rait tasol long Wantok Niuspepa bai mi lukim. Tenkyu.

P.K. Ano
Gordons
Port Moresby

Salim ol pas i kam long
WANTOK
BOX 1982
BOROKO

MIPELA SAVE MEKIM OLKAIN WOK BILONG BENG

☆ Pas Buk

☆ Sek Buk

☆ Man i ken putim mani long beng na winim profit mani

☆ Sapos yu kisim narakain mani bilong wanpela arapela kantri, beng i ken senisim i kamap kina na toea.

☆ Ben i ken stretim olgeta tiket bilong yu, sapos yu laik go lukluk raun long arapela kantri.

Bank of New South Wales (PNG) Ltd.

Mipela amamas tru long helpim yu



Mista Pita Kalaman

Lokal Faktori Long Lae

PROVINS
NIUS



Long Lae dispela tok, "JOB", i gat mining na em i gat biknem.

"Job" em i min "Joseph's Old Boys". Em i olsem olgeta man i bin winim sen Josep Vokesenel Skul long 8-mail.

Ol studen bilong dispela skul i gat tupela bikpela wok wanu, ol i gat kampani bilong wokim olkain haus na komuniti senta. Ol i save wokim ol haus na opis bilong Lae siti na Lokal Gavman Kaunsil na sampela kampani. Ol i gat gutnem tru.

Nau ol i statim K34.00

nupela Faktori bilong wokim olkain samting i stap insait long haus, olsem tebol na sia na bet. Faktori bilong ol i stap long hap bilong Lae ol i kolim Omili.

Planti pipel i laik baim ol samting ol Job i wokim, long wanem, prais i dauntru. Em hia sampela eksampela

Tebol — K22
4 — sia K 6.

Srang bilong kaikai K15.....

Bet — K14

Bikpela dabol Bet —

Ol i save wokim tu ol samting bilong opis olsem desk na ol bet bilong buk.

Hetman bilong bosim dispela Faktori em i Mista Pita Kalaman bilong Madang. Em i bilong liklik ples Rivo na i bin skul long Alexishafen. Bihain em i kam na winim skul na wok aprentis long sen Josep Vokesenel Skul long Lae. Tude 8-pela arapela kamdaman i poromanim em long wok.

Sen Josep Vokes-

enal skul i stap samting olsem 10-pela yia nau.

Pasin bilong ol long skul i narakain tru. Man i winim skul bilong ol, em i save tru long wok wantaim olkain smolpela tu, em yet inap long baim. Save bilong em i no hangamap long olkain bikpela masin. Planti Vokesenel Skul i yusim ol bikpela masin na bihain ol sumatin i winim skul na i no inap kirapim wok bilong ol bikos ol i no ken baim masin.

Ol Sen Josep bai (Job) i no olsem. Winim skul pinis, nau ol i redi long kirapim bisnis bilong ol stret. Na ol i bin mekim tupela taim pinis long

Lae. Ol yet i winim mani bilong kirapim bisnis. Em i bilong ol stret. Ol yet i mekim wok. Brata Hubert em i raun tasol helpim ol, olsem bikbrata i lukautim yangpela i skul yet long wok.

Sapos oi arapela Vokesenel Skul i bihainim pasin na aidia bilong Sen Josep Skul, bai planti yangpela man moa i painim gutpela wok. Olgeta taun na olgeta provins i mas gat tupela faktori. Olsem ol "Job" i ranim nau long Lae.


Kas bilong ol "Job" na ol brata i skulim ol.

Frank Mihalic



COCA-COLA AND COKE ARE REGISTERED TRADEMARKS WHICH IDENTIFY THE SAME PRODUCT OF THE COCA-COLA COMPANY

HRME 015 6365




Ol srang, bet na tabol ol i wokim pinis long faktori bilong ol.

Kurumul Ti

DISPELA KURUMUL TI I GO PAS TRU LONG OLGETA ARAPELA TI LONG PAPUA NIUGINI.
EM I WINIM OLGETA ARAPELA TI LONG PAPUA NIUGINI.

YU INAP PAINIM KURUMUL TI ISI TRU LONG OLGETA SUPAMAKET NA TRET STUA.




Mista Galeva Kwarara

Praim Minista Mista Michael Somare i tok insait long kibung bilong Nesenel Palimen long las wik olsem Gavman bai kirpaim ol liklik suga bisnis long ol ples long PNG.

Gavman i no bisnis long PNG. Mista Kwarara i tok em i nogut sapos long kirapim ol liklik suga bisnis long PNG, Gavman i kirapim Mista Somare i tok. bikipela suga bisnis lo long wanpela hap tasol. Long wanem em bai i no inap bring-im wok long olgeta PNG man.

Gavman bai kirapim liklik na bikipela suga bisnis. Tupela wantaim.

Mista Somare i toktok olsem taim em i bekim askim bilong namba tu lida bilong Oposisen, Mista Galeva Kwarara. Mista Kwarara i askim Praim Minista long tokaut long wanem tingting Gavman i gat long kirapim suga salim ol sea. Tasol, Gavman i tok sapos i no salim planti ol sea bilong Ramu Suga inap long 38 milien kina bai Gavman i pinisim dispela bikipela wok suga Gavman i wet inap long mun Feb-rueri long 1980 long salim ol sea.



Mista Joseph Aoea

Gavman i tingting long makim sampela moa PNG Lo man long holim wok olsem Jas long bik Kot bilong PNG long mun Feb-rueri long yia 1980.

Praim Minista, Mista Somare i tok olsem insait long kibung bilong Nesenel Palimen.

Em i bekim askim bilong Joseph Aoea, Memba bilong Kairiku-Hiri. Em i askim Praim Minista i gat wanem tingting tru long painim nupela Jas long kisim ples bilong ol 5-pela Jas i laik pinis long dispela yia.

Long tupela wik i go pinis Gavman i makim nupela namba wan Jas em Jastis Wooten bilong Australia. Gavman i makim tu namba wan PNG man long kamap Jas long bik Kot. Em Mista Mari Kapi bilong Rigo insait long Sentral Provins.

MOA

LONG MONI BILONG YU



TRAKA I WOKIM GUT OLGETA SAMTING

Wantaim 1166cc ensin, Traka i gut tru long draivim na em i gat strong long go antap long ol maunten na long rot i nogat kolta. Yu inap foldim ol sit sapos yu laik karim kago long baksait. Gutpela Toyota mechanical parts i givim gutpela wok. Tasol bai yu mas kisim spares tu sapos yu laikim. TRAKA i wok tupela wei na i gutpela transport bilong ologeta wantaim prais ino dia tumas. Go lukim ol - Draivim ol nau long ELA MOTORS.



TOYOTA
TRAKA



ELA MOTORS

A Member of Burns Philp Group

YU ASK LONG EN. YU KEN KISIM TOYOTA

Wumens Klab Long Hos Kem



Ol Waiki (Parama Viles) Wumens Klab wokim singsing bilong hamamasim ol visita.




Ol sampela lain pren i kam lukim pestode bilong ol.



Ol Wumens Klab bung long wasim na stretim klab haus long redi long pestode.

Ol Kiwai bilong Westen Provins i stap longtaim pinis nau long Hos Kem long Kilakila, Mosbi. Hos Kem i kamap olsem ples stret bilong ol. Ol i gat wara. Ol meri bilong ol i taitim bun na wokim wanpela klab haus. Long klab haus bilong ol, ol i save wokim miting na lain long samap na kukim kaikai.



Ethel Gabi na Waipari Koiwaku kisim ki bilong masin bilong samap long 2-pela tokmeri bilong R.S.L. Misis Hazel McDonald, kuskus na Betty Dunbavan, nambu kuskus.

I gat 4-pela lain Wumen Grup hia long Hos Kem. Waiki-Parama Viles; Iogu-Flai Riva; Oronai-Samari Viles, na Barasaro-Flai. Na tu i gat Elehaus Wumen Grup bilong ol meri bilong Galp Provins.

Long 31, Oktoba ol meri bilong Boroko R.S.L. Wumens Klab i givim 4-pela masin bilong samap wantaim

sampela sisis na wanpela laplap.

Misis Betty Dunbavan na Misis Hazel McDonald, tupela pesmeri bilong Boroko R.S.L. Wumens Klab, i bin givim ol dispela samting long Wumens Klab. Ol Wumens Klab bai yusim ol dispela masin long samapim ol kain kain klos. Bihain ol i laik wokim sampela liklik bisnis long ol



dispela samting ol i samapim pinis.

Taim ol i kisim ol dispela masin ol Wumens Klab i wokim sampela Kiwai bilong amamasim ol pipel i kam lukim pestode bilong ol. Na tu ol i kukim kaikai na dilim long ol pipel olsem olgeta sindaun bung wantaim na amamas.

Tupela meri bilong Pot Mosbi Komunitei Developmen Grup tu i kam lukim dispela pestode, Misis Margaret Tino na Hela Pong. Tupela i wok long helpim ol meri bilong Mosbi Siti i go het long ol kain kain wok bilong ol.

Lily Tabua

KUKIM GUTPELA KAIKAI

PAMKEN NA RAIS

Ol samting yu mas i gat:

1. Wan kap pamken yu skirapim pinis
2. 2 kap rais.
3. 3 kap wara bilong kokonas.

Ol we long wokim:

Rausim skin bilong pamken na skirapim i go liklik. Wasim rais. Putim susu bilong kokonas wantaim rais long sospen. Taim susu i boil pinis kapsaitim pamken. Larim i stap inap em i kuk pinis.

SINGER

PREN BILONG YU
INAP OLTAIM



MITSUBISHI

the Bus for the 80's



Taim yu tingting long bas, yu save tingting long ol pipel wantaim.

Yu no laikim 'bas tasol', yu laikim wanpela bas i no save bruk kwik na i gutpela long sindaun long en, na ol man i ken amamas taim ol i raun.

Bikpela MITSUBISHI tru ol i save kolim. FUSO — em i save wok strong tru na i no inap bagarap kwik.

Narapela liklik long Fuso i ROSA bas. Em i gutpela bilong ol skul, PMV, bikpela bisnis na karim planti pipel. Em inap karim 26 pipel na i gat bikpela spes long ol bilum samting, wanpela dua bilong draiva stret, na em i namba wan tru long draiv!!

Liklik bas tru em inap long famili bilong yu, o liklik bisnis bilong yu o long raun raun nating — em i L300 Mini-Bas. Em i liklik bas tasol yu no sindaun klostu klostu.

TOBA

PTY. LTD. LONG OLGETA HAP BILONG P.N.G.

YU NO KEN BAIM BAS, YU LUKIM MITSUBISHI PASTAIM!

HEBAMO 062

Palimen Nius

Nupela Takis

Gavman i apim takis bilong loli wara, ol laisens bilong ka na motobaik na takis bilong baim laisens bilong Hotel, Taven na Klap.

Gavman i apim takis tu long ol sayor ol bikpela stua i save kisim long ol ovasis kantri. Long wanem Gavman i laik bai PNG yet i kamapim ol sayor bilong ol pipel. Takis i go long ol sayor long tin na ol sayor long frisa.

Gavman i apim takis tu long ol kain kain masin ol man i save baim long helpim ol wok insait long haus. Ol masin olsem bokis ais, masin bilong wasim klos, na masin bilong brumim plua na kain masin olsem.

Hia yu ken lukim olupela prais bilong

sampela samting na ol nupela prias bilong en:

PRAIS BIPO PRAIS BILONG NAU

Laisens bilong ka (1300cc)	K 25.00	K 66.00
Bikpela ka (4000cc)	K 55.00	K 170.00
Loli Wara	20t	22t
Laisens bilong Hotel, Taven, Klab (long Mosbi, Lae Rabaul Panguna)	K520.00	K2,500.00
(long Goroka, Madang, Wewak Pependetta na Kundiawa)	K260.00	K1,000.00

Ben Skorpio

Baset

PNG yet i mas wok hat long painim o bungim mani long kantri yet long peim bek dinau em Gavman i kisim long mekim kamap Baset long ranim wok insait long kantri, Minista bilong Finens, Mista Hollowai i tok.


Em i tok Gavman i kisim dinau long arapela kantri long mekim kamap baset.

Sapos PNG i no kisim dinau em bai i

hat tru long Gavman long painim inap mani long mekim ol bisnis na arapela samting long kamapim mani long ranim kantri Mista Hollowai i tok, Gavman i stadi gut tru pastaim na i wok long kisim dinau. Na i luk olsem PNG i ken bekim bek dispela ol dinau.

Em i tok long dispela taim PNG i no inap long tokim Australia i no ken helpim yumi moa long mani, long mekim wok insait long kantri.

Mista Hollowai i tok long arapela yia



Mista Barry Holloway 1980, PNG Gavman bai holim toktok wantaim Australia long mekim wanem samting long kisim helpim bilong Australia long ol yia 1981 i go.

Australia i makim pinis wanpela save-man tru long lukluk i go insait long wanem helpim PNG i ken kisim long Australia long bihain long yia 1981.

Mani i go long ol Provins

Hia daunbilo yu ken lukim ol mani Gavman i givim long yia 1980 long ol Provins long mekim wok bilong ol.

I gat 4-pela provinsal gavman i bosim olgeta mani i kam long ol. Em Is Niu Briten, Not Solomons, Isten Hailans na Niu Ailan. Tasol, Dipatmen bilong ol Provins yet i bosim ol baset bilong planti wok bilong ol arapela provins.

PROVINS	MANI
Westen	3,985,255
Galp	4,153,753
Sentral	7,448,042
Milen Be	6,344,392
Oro	3,859,646
Sauten Hailans	8,509,036
Morobe	11,400,067
Madang	7,687,725
Is Sepik	7,668,557
Wes Sepik	5,491,355
Isten Hailans	8,267,772
Simbu	7,154,899
Westen Hailans	9,232,831
Enga	7,099,156
Manus	2,886,354
Niu Ailan	6,178,923
Is Niu Briten	8,305,252
Wes Niu Briten	4,882,272
Not Solomons	11,758,366
Ol sampela Provins	13,700,000
Olgeta wantaim	K146,014,653

William Willando




Photo i soim ol lain bilong protes mas i bungim ol plis klostu long Haus Palimen long Mande, 5, Novemba. Dispela lain ol i laik givim 3-pela strongpela askim i go long Nesenel Palimen. Ol i wok long singaut long ol kain tok olsem: Pinisim Palimen nau. Senesim Gavman kwiktiam. Rausim olgeta kalabusim hariap. Lida bilong

dispela protes mas Mista Wera Keomara i tok: "Somare i putim mak pinis taim em i rausim Misis Rooney. Nau i gat tupela kain lo insait long kantri. Wanpela bilong ol bikman na arapela bilong yumi ol pipel. Gavman mas a rausim olgeta kalabusman nau".



PHANTOM

COMICS

No.668

PHANTOM AUTIM TIKET BILONG OL RASKALS.

Moa Moa Pikinini i Hangre

Long yia 1979, i gat moa moa pikinini i hangre na i gat sik bun nating long wol. Namba bilong ol pikinini i hangre na i kisim sik bun nating, i winim tru namba bilong ol pikinini i painim dispela kain trabel long yia 1978.

Yunaitet Nesen i painimaut pinis olsem, namel long ol pipel husat bai dai long yia 1979, moa long 50 pesen em ol pikinini tasol.

Dispela samting i mekim olgeta pipel i guria tru. Em long wanem, sapos planti pikinini i dai olsem, bai yumi mekim wanem.

Wol Fud Program bilong Yunaitet Nesen i save helpim tru long givim kaikai long ol dispela pikinini. So-saiti ya i statim wok bilong ol long yia 1963 inap nau ol i givim pinis 550 milien kina olgeta bilong helpim kaikai bilong ol dispela tarangu pikinini. Na ol i ting, bai ol i inap painim 11.5 milien kina moa long wok bilong helpim ol ples o grup we ol pikinini i hangre na i gat sik bun nating.

Tasol, Wol Fud Program i no gat inap samting olsem kaikai long helpim ol mama na pikinini wantaim. Ol i no gat inap mani long baim moa kaikai bilong ol pikinini.

Ol Wol Fud Program i wokim wanpela tok piksa. Ol i tok, sapos yumi yusim dispela mani ol kantri i save yusim long baim olkain samting bilong pait olsem gan, bai

olgeta pikinini long wol i gat inap kaikai. Na olsem tasol, bai ol pikinini inap long gro gut tru.

Ol pipel husat i save kisim helpim long kaikai, i mas wok hat tu long kamapim kaikai bilong ol yet.

Wanpela tisa long Lesotho Skul, long Afrika, i bin raitim pas i go long Wol Fud Program na tok, skul bilong em i bin kisim ol tul pinis. Ol dispela tul bai helpim ol pikinini long wokim na lukautim gaden bilong ol yet. Na tu em i tok, ol dispela samting i bin kostim samting olsem K3,000 olgeta.

Tisa ya i tok tu olsem: "Mi amamas long Wol Fud Program i tingting long ol pikinini. Mipela olgeta i amamas long lukim wilbaro, spet, ol baket bilong karim wara na rek. Bai mipela i wok long gaden long olgeta de. Na tu bai mipela i yusim ol dispela tul long wokim gaden bilong mipela. Tenkyu tru long yu papa."

Lilly Tabua

Stretim Tok

1. Em wanpela kaikai ol i wokim long susu bilong bulmakau.
2. Pikinini bilong Jacob na brata bilong Josep.
3. Pikinini man.

1		
2		
3		

Long wik i go pinis.

1. pes
2. Emu
3. sut




Tripela man hia bilong Tambuan Vile long Sepik. Ol i wok long sapim wanpela diwai ol i kolim "Kina Tree". Ol redim disela diwai bilong Saut Pasifika Festival Ats. Ol wokim dispela s long Mosbi long 1980. Nem bilong 3-pes man em hia Mosi Karmbu, Philip Ke Peter Dau. Wanpela wantok Joe Simb. was i stap.


Philippine Airlines tasol inap long helpim yu long sevim mani long bukim hotel long Manila.

Long olgeta Fraide, Philippine Airlines i save flai i go stret long Manila, long Asia. Taim yu go kamap long Manila, bai yu pilim yu stap long narapela kantri. Ol prais bilong ol samting i no dia tumas. Na pasin bilong ol i gutpela tru. Philippine Airlines bai helpim yu na tok save long ol hotel em ol i no dia tumas long taim yu go insait long balus. Long taim yu laik go, bukim hotel wantaim Philippine Airlines. Sapos no gat, yu ken askim long buk ol i kolim "Stopover Manila." Long

taim yu laik go long Europe, Asia na America long Philippine Airlines, stop long Manila. Em bai kostim yu K10.00 tasol long slip long wanpela nait long hotel. Tasol sapos i gat man i kam wantaim yu, bai em i mas baim K7.00 tasol. Bai yu kaikai namba wan kaikai bilong ol Philippine stret. I gat planti gutpela samting bilong baim na kisim long tingting bek long raun bilong yu. Bai yu kisim fri dring tu. Long K10.00 tasol bai yu kisim ol dispela samting long Manila.



Stopover Manila.
K10* per night. K7 share twin.



 **Philippine Airlines**

Burns House, Champion Parade, Port Moresby, Phone 21 1108
or P.O. Box 3271, Port Moresby.

Kilim Presiden

Presiden Park Chung Hee bilong Saut Korea i bin dai pinis long 27, Oktoba. Dairekta bilong Korea Spesel Plis, i olsem C.I.B., Msta Kim Jae Kyu i kilim indai Presiden Park. Em i kilim indai Presiden long wanpela pati kaikai. Ami nau i bosim Saut Korea.

Bipo long 1951 Korea i wanpela kantri tasol. Tasol bihain long wanpela bikpela pait, kantri i bruk namel long tupela hap. Not na Saut Korea.

WOL

kampani bilong Korea i wokim bikpela hol aninit long graun bilong Ramu Hidro Pawa.

Bikpela wok bilong Gavman i stap nau long han bilong Ami. Tasol aninit long lo bilong Gavman i stap nau long han bilong Ami. Tasol aninit long lo bilong Gavman namba tu Presiden inap long sanap long ikeksen sapos em i inap long holim sea bilong em i go inap long 3-pela mun olgeta. I luk olsem namba tu Presiden, Mista Choi Kyu-Hah, bai i winim dispela ileksen.

Long taim bilong Presiden Park ol lain bilong Saut Korea i save wok hat tru na ol i kirapim planti bikpela faktori. Tasol sampela man i ting Presiden Park em i strongpela man tumas na em i wok long kalabusim ol man i wok long tokaut egens long Gavman bilong em. Natu Presiden Park i bin kalabusim ol sampela lida bilong ol sios.



NIUS


Ol i kilim indai Presiden Park long Seoul, em i biksiti bilong Saut Korea. Presiden Park i bin bosim Gavman bilong Saut Korea. Sampela pren bilong ol lain Saut Korea em Amerika, Australia, Nu Silan na Ingran. Not Korea em i wanpela Komunis kantri. Rusia na Saina i tupela bikpela pren bilong ol.

Papua Niugini i stap pren bilong Not na Saut Korea wantaim. Yumi save baim planti samting long Saut Korea. Na Saut Korea i tokaut pinis long givira helpim long Gavman bilong Somare long kirapim wanpela bikpela wok timba long Wes Nu Briten. Bipo wanpela

● A.R. Rumber

N.&S.KOREA

100 mls



Piksa hia i soim, Korea. Not Korea na Saut Korea. Kantri i bruk long tupela hap bihainim long woa long 1951.



Nem bilong mi

NEW KILOMETRICO


Mi no inap pinis kwik. Mi stap long taim, long taim

Traim

* Yu ken baim blu o ret o blak

KILOMETRICO
by PAPER & MATE

MAKET LONG ROT



Kila Beuma em i kam long Koiari. Em i stap long Saraga. Em i tok sapos mi gat planti kaikai orait mi karim i go long maket. Tasol sapos mi gat liklik tasol orait mi maket hia long 6 mail.

SITI KAUNSI BEKIM TOK

Mosbi Siti Kaunsi i gat lo olsem, wanem man i laik salim kaikai, buai, frut, sayor, pis abus, kaving na ol kain samting olsem i mas salim long ples maket.

Long 1972 Siti Kaunsi i wokim dispela lo. Aninit long dispela lo Siti Kaunsi i gat pawa long makim ol ples maket. Na husat man i wok long salim samting utsait long maket, i

mas baim kaunsi. Ol i mas baim siti kaunsi long K20 o go long kot.

Tasol, saveman bilong lo bilong Siti Kaunsi, Mista Tauna Veratau, i tok wok maket em i tok wok maket em i wanpela we ol Siti Kaunsi i gat long painim mani bilong hapim wok bilong Kaunsi. Em i tok ol ma i laik salim samting i mas baim dua long 10t i go inap long K1.20. Prais i go antap sapos man i laik bringim planti samting long maket. Sapos

Kaunsi i nogat dua long maket Mista Veratau i tok bai ol i no inap painim mani long mekim wok bilong Kaunsi.

Mista Veratau i tok planti taim mipela sasim ol man long K5 tasol taim ol i brukim lo bilong Kaunsi na wok long baim samting long rot. Em i tok i gat 5-pela maket long Mosbi Siti i aninit long Siti Kaunsi, Gordons, Boroko, Waigani, Sabama na Gerehu. Wanpela komiti i bosim Koki Maket.


Na tu Mista Veratau i tok Siti Kaunsi i mas was gut bai Mosbi i klia. Tasol sapos yumi larim ol man i wok long baim na salim long

rot bai ples i doti olgeta. Olsem Kaunsi i save salim ripot long plis na ol i save rausim ol man i wokim maket long rot.

Lily Tabua



Maria, Peter na Bomae ol i bilong Kigane Viles, Simbu. Peter i tok maket em i ples bilong salim ol kaikai tasol mipela ol man bilong salim ol kaving Siti Kaunsi i mas givim spes long mipela. Sapos ol turis i stap mi inap winim K60 long wanpela de.



Maria Uia em i bilong Gunimaita Viles long hap bilong Tapini, Sentral Provins. Em i save wok long baim buai. Tasol em i no laik bai ol Mekeo i wok long salim buai long rot, bilong wanem ol i mekim planti pipia. Long dispela tasol Uia i tok ol Siti Kaunsi i laik rausim mipela.

A dai Suse em i bilong Gegoava Viles, Tapini. Em i tok bisnis long salim buai i gutpela tru. Long wanpela de mi inap winim K10. Mi helpim man bilong mi. Em i wok olsem penta na mi helpim em long baim kaikai bilong ol pikinini. Olsem ol pikinini bilong mi i no mekim wanpela raskal trabel bilong wanem ol i gat inap kaikai.

NUPELA I KAMAP

LYSAGHT

LIK LIK KAPA

1 inch

Em i no inap bruk o bagarap taim yu sanapim o karkarim. Isi long sanapim. I strong olsem ain.
• Gutpela bilas.



LIK LIK KAPA — SIZE 2440cm(8') x 610cm(2') SHEETS

LYSAGHT

LIK LIK KAPA

Baim long olgeta hap igat kapa bilong Lysaght

Gutpela samting i kam long John Lysaght (Papua New Guinea) Pty Limited



Mista T. Gigina Bonove em i bilong Efogi, Sentral Provins. Em i tok i gat wanpela ples long salim ol kaikai, em maket. Olgeta man i mas aut long rot na go long maket sapos ol i laik salim kaikai. Tasol mipela ol man i wok long salim ol kaving ol Siti Kaunsi i mas givim spes long mipela. Bilong wanem mipela nogat narapela ples long salim ol kavings. Na tu taim ol turis i save raun long Mosbi ol i ken lukim ol kastam na pasin bilong PNG. Gigina i tok sapos ol turis i stap em inap winim K70 long wanpela de. Tasol sapos i nogat turis em winim K6 tasol long wanpela de.




Raka Ila em i bilong Keapara Viles, Hood Lagoon, Rigo. Raka i tok bisnis bilong em i gutpela. Em i tok, sapos mi karim samting i go long maket ol man i no inap lukim. Olsem wanem na ol i inap baim. Sapos mi strong mi inap winim K50 long wan wik. Tasol sapos Siti Kaunsi i rausim mi bai mi painim mani we long baim kaikai. Mi man bilong bus na mi no gat narapela rot long painim mani.



Olive Masu em i bilong Mou Viles, Bereina. Pren bilong em Shirley Vali em i kam long Rigo. Olive i tok em i gutpela ol Siti Kaunsi i rausim ol man i wok long salim ol kaikai long rot. Mosbi i mas stap klia, Olive i tok. Em i tok em i save salim buai bilong em long maket na long 6 mail.

Air Niugini **helpim go het** **bilong** **Kantri**



FAST **COMMUNICATION**

AIR NIUGINI 

Laikim Ileksen

Memba bilong Milen Be, Sir John Guise i tok ol memba bilong Nesenel Palimen i pret tumas long go bek long ples na holim nupela ileksen. Dispela long wanem ol memba i bin lusim rispek bilong ol pipal pinis. Sir Guise i bin mekim dispela tok taim em i bin putim mosen i go long Palimen long Tunde long dispela wik yet.

Sir John i tok, ol memba i mas pasim Palimen nau tasol. Na ol i mas go bek long ples na wokim nupela ileksen long neks yia. Em long wanem ol pipal i les pinis long pilai politik bilong ol memba. Olgeta manmeri insait long kantri i les pinis

na i no hamamas tru long ol memba.

“Sapos mipela i no holim nupela ileksen long 1980 em i luk olsem bai olgeta samting bai i paul.”

Mista Michael Somare i tok, em i no pret long go long ples

na holim nupela ileksen. Em i tok em i nap winim ileksen long hap bilong em. Tasol em i tok olsem, ileksen bai i no ken givim bel hevi long Praim Minista tasol. Em bai bagarapim ol Nesenel Sensus i laik kamap nau. Mista Somare i tok, Gav-

man bilong em i no pret long lusim K1 milion long ranim dispela ileksen.

Nau tu Sir Pita Lus i tok, Palimen i no i nap pinisim wok bilong em. Em i tok yumi no inap wokim ileksen inap long 1984. Tasol Spika bilong Palimen Mista Dibela i tok dispela tok bilong Sir Pita Lus i nogat as bilong em. Olsem mosen bilong em i lus. Mosen bilong Sir John i lus wantaim.

● A.R. Rumber




Wanpela liklik Enga meri i wok long stretim gras bilong sipsip. Mama bilong em i save wokim olkain klos na bilas long dispela gras bilong sipsip.



Hia yumi lukim tupela brata, Musogo na Kapa Namibe bilong Kafetugu Viles, Henganofi. Tupela i laik go long wok long kopi gaden tasol em i kol tumas. Olsem tupela wetim san kamap pastaim. Hailans em ples kol tu.

COLD POWER

*Resis long painim
ol tok i lus pinis*



Resis i isis tumas. Long olgeta wik, wanpela man bai winim K30.00. Na tu long las wik bilong resis, olgeta man husat i putim nem insait long resis i ken resis long winim K130.00.

Yu ken salim nem bilong yu na tiket planti taim. Tasol, yu ken pulimapim wanpela tiket tasol long wanpela skinpas. Na tu olgeta taim, yu mas salim nem bilong yu, yu mas salim wantaim dispela hap skin bilong Cold Power bokis.

Nem wantaim skin bilong dispela skin bilong paket i mas kamap long N.B.C. bipo long 14 Desemba, 1979.

Winim bikpela
prais!

Raitim ol tok i lus long dispela hap.

COLD POWER
*Raitim ol tok i
lus pinis*

Resis long Painim Tok I Lus Pinis. Sampela toktok i lus long stori. Raitim dispela tok long skin bilong Cold Power bokis. Raitim nem na adres bilong yu na salim i go long:-

C/- Radio N.B.C.
Box 1359, BOROKO, NEW GUINEA

Nem _____
Adres _____

NIUS-WOL NIUS.

☆ **ÑESENEL ILEKSEN** — Presiden Marcos bilong Philipine i tok aut pinis olsem em redi long sanap insait long wanpela Nesenel Ilekseen. Tasol em i no makim wanpela de long kamapim ilekseen. Long dispela taim ami bilong Philipines i bosim kantri.

☆ **TAMBUIM SUSU** — Ol bikpela kampani husat i save wokim ol kaikai bilong ol liklik bebi olsem susu na ol arapela kain saming i salim tok pinis long Wol Helt Oganaisin. Ol i tok orait long tambuim ol kain tok-save bilong grisim ol mama bilong baim kaikai bilong liklik bebi ol i wokim long faktori. Ol i i laik pinisim dispela wok ol i kolim edvatismen na mekim sampela wok long givim save long ol mama long givim susu bilong ol yet ol bebi. Moa long 10 milien pikinini i save dai long olgeta yia long ol sik em ol saveman i tok i kamap long ol kaikai bilong bebi ol i wokim kamap long faktori.

☆ **WASTIM MANI LONG AMI** — Wanpela ripot i kam long Amerika i tok olsem. Long yia 1978 ol kantri bilong wol i lusim moa mani long ami bilong ol olsem ol i lusim long skulim ol pikinini bilong ol.

Ol kantri i lusim moa long 159 tausen milien kina long olgeta wok ami bilong ol. Tasol ol i lusim liklik mani tasol long skulim ol pikinini. Ripot i tok ol kantri i lusim K6,000 long stretim wok bilong wanpela soldia long wan wan yia. Tasol ol i lusim K66 tasol long stretim skul bilong wanpela pikinini long wan wan yia.

☆ **ZAMBIA** — Wanpela kantri long Afrika, i tok olsem 1,000 soldia bilong ami bilong Rodesia i brukim boda mak na i go insait long kantri bilong ol. Presiden Kenneth Kaunda bilong Zambia i tok, ol ami laik bagarapim ol wok kapa bilong Zambia. Zambia i save painim moa mani long wok kapa.

☆ **BIKPELA MERI INDAI** — Meri bilong olpela Presiden bilong Amerika, Presiden Dwight Eisenhower, i dai pinis long Nov. 2. Em i gat 82 kristmas na em i dai long wanpela haus sik long Amerika.

☆ **BLAK LIDA I KROS** — Ol Blak Lida bilong Zimbabwe - Rodesia i no laikim wanpela tingting bilong Ingran. Insait long kibung Ingran i tok ol Blak Lida na lain pati bilong ol i no inap stap insait long nupela ami. Nupela ami hia lukautim kantri na bosim Ilekseen bilong nupela Gavman. Ingran i laik bai ol yet i bosim dispela ami. Tasol ol Blak Lida i tok ol i no inap tok orait long Ingran i bosim dispela ami.

MEMBA 1978  BILONG 1979

WOL SKIN PUKPUK SO

Salim skin pukpuk long dispela mak tasol. Mak bilong yumi olsem, namba wan kampani bilong PNG i sanap long So Bilong Skin Pukpuk Long Wol long hap bilong Frans na Yurop, long 1978 na 1979. Tingim prais bilong yumi, em i winim tru prais bilong ol narapela kampani long PNG o ovasis. Em hia adres bilong yumi.

Central Pacific Import/Export Pty. Ltd.,
P.O. Box 6699,
BOROKO'

Phone: 211623 o 21.1635

Sapos Yu Laik Kamap Wanpela Memba Tu.

MISTA ... TOKSAVE LONG..



AUTBOD MOTA

Ian Donald i raitim

AUTBOD MOTOS



Lesen 1

Autbod moto em i wankain tru long engin bilong balus. Tupela wantaim i mas i gat gutpela wasman. Na sapos engin i bagarap tupela wantaim i mas i gat mekanik long stretim. Long wanem tupela engin wantaim inap kilim indai planti man meri sapos i bagarap.

Sapos yu tingting long baim wanpela autbod moto yu mas go stret long

stua na toktok wantaim man i bosim wok long salim autbod moto. Yu mas skelim ol moto na painim wanpela i inap long mekim wok bilong yu na tu yu i gat mani inap long baim.

Taim yu go long baim yu mas save long ol dispela saming: na yu mas tok klia long kuskus long stua:

1. Yu gat hamas mani long baim moto.

2. Wanem kain bot o kanu yu laik moto bilong yu i wok long en.

3. Brait na longpela bilong bot o kanu.

4. Hamas kago o hamas pipel yu laik putim i go insait long kanu o bot.

5. Moto bai i raun we? Long riva, long raunwara o long solwara.

6. Sapos yu baim wanpela moto bipo, olsem wanem long en.

Yu bagarapim olsem wanem.

Taim yu givim ol dispela toksave long kuskus em nau kuskus i ken tok klia long yu:

1. Wanem moto i gutpela long mekim wok bilong yu.

2. Hamas pe bilong en.

3. Longpela bilong moto (saf)

4. Wanem kain propela yu mas putim.

5. Em inap helpim

yu olsem wanem bihain.

Yu no ken wari long askim planti long ol kuskus. Ol i skul pinis na ol i laik helpim ol man long lukautim gut ensin bilong ol.

Tasol sapos yu longlong na yu yet bagarapim ensin em wari bilong yu.

Sapos yu baim wanpela ensin pinis na yu no klia tumas long ol we long lukautim orait Mista Tul i redim 6-pela skul long helpim yu long lainim we long lukautim.

SAPOS YU TINGTING LONG AUTBOD MOTO...

Johnson I NUMBA WAN TRU!

Sapos yu tingting long baim wanpela autbod moto you go long Steamships Machinery na askim long ol kain kain Johnson autbod i stap.

Ol i gat bikpela moto long wokim strongpela wok olsem pulim bikpela bot, na liklik moto long raun raun o kanu tasol.

Ol lain Steamships Machinery inap tokim yu long wanem kain moto i gupela long mekim wok bilong yu.

Steamships - MACHINERY

PORT MORESBY . LAE . KIETA . MADANG . RABAU
POPONDETTA . SAMARAI . VANIMO

HEBAMO 060

OL PAS



Husat I Tok

Dia Edita — Mi save kisim Wantok Niuspepa olgeta taim na mi save lukim planti man i autim wari na bel hevi bilong ol na tu mi save harim sampela nius long redio na mi save belpen na wari olsem na mi laik autim wari bilong mi nau.

Wari i go olsem long mun Septemba 4 long Mande nait mi harim redio i toktok

long ol nambis i ken givim grauh long ol hailans olsem na mi askim yu husat Minista o Memba o bikman yu toktok. Sapos yu laik givim graun long lain bilong yu orait yu ken kisim ol i go na givim graun bilong yu stret. Yu no ken lukluk long graun bilong mipela long nambisman na yu toktok mipela i no laik long man bilong kosim trabol o mekim nem nogut long hap bilong ol na i no inap long kam mekim nem nogut long mipela. Long wanem mi tok olsem? Sampela pasin nogut bilong ol mi bin raitim long wan pela pas na mi salim i go pinis. long yupela Wantok.

Olsem na mipela sampela man mipela i

no inap givim graun nating long man no-gut save laik bilong mipela, mipela i laikim ol man i gat bikpela save. Ol i gat bikpela save long ol kain wok. Em ol bai pipel ol inap long kam na developmen dispela kantri na kamapim planti wok long PNG, na PNG gavman i ken lukautim yumi olgeta.

Em i laik bilong mipela sampela man long Morobe Provins. Em tasol na tenkyu, yu husat i kros o sapatim tok bilong mi, em i orait tasol, na rait i go long Wantok Niuspepa bai mi hamamas tasol long lukim.

Jackwyn Tajimo, Lae, Morobe Provins.

Laikim Bot Pipel

Dia Edita — Mi gat sampela laik olsem, mi harim na ridim long niuspepa tok klostu bai ol lain Vietman bai pinis long solwara.

Em long wanem yumi ol man bilong P.N.G. yumi tok kantri bilong yumi emi kristen. Tasol bilong wanem yumi no soim kristen pasin bilong yumi i go long ol.

Ol dispela man ol i hangre long gutpela pasin or sindaun. Mi lukim na harim olsem planti ol man bilong hap bilong mi ol i hamamas tru long ol dispela man i orait long kam long hap bilong lukautim ol.

Ol dispela man tasol bilong wanem Gavman i no tok orait long ol dispela man i kam insait long kantri. Ating, Gavman i no laik God i litimapim nem bilong yumi. Mi ting em i gutpela sapos yumi kristen kantri yumi mas kisim 1,000 o 2,000 pipal.

Dispela bai mipela i soim ol narapela kantri olsem mipela i kristen. Na mipela i laikim ol narapela kantri, i sindaun gut. Na tu mipela soim ol long gutpela pasin. Tasol mi harim olsem mipela i helpim ol long moni em i samting tru. Em i samting nating tasol, long wanem ol i no stap gut long wanpela graun ol i stap antap

long solwara, na dispela moni mipela givim ol emi no nap helpim ol tru.

Tasol mi harim pinis ol sampela kantri olsem Amerika na Inglan, Yurop ol i kisim planti. Tasol yumi i no nap kisim planti olsem ol kisim? Tasol yumi kisim olsem 1,000 o 2,000 em i orait, bai yumi soim sori bilong yumi long ol.

Nogut yumi stap olsem man bilong daunim ol tarangu man na apim man i gat nem. Sapos yu laik glasim gut yu, lukim long dispela Jems 2: 1-4. Mi askim Gavman mi laikim Gavman i mas tok orait long ol dispela lain turangu Vietnam long kam insait i no moa long 2,000 Sapos Gavman i tok orait long kam long P.N.G. i nap mi kisim 2 o 3 man long lukautim ol.

Tasol nau mi askim Gavman long dispela sapos yu bilong P.N.G. ol pipal yu mas harim dispela tok bilong mi. Na tok orait long ol Vietnam i kam insait long kantri bilong yumi.

Em tasol, sapos yu kristen man i laik sapatim tok bilong mi, em i orait sapos yu pilim nogut rait tasol long Wantok Niuspepa na mi long lukim.. Tenkyu.

Andrew Dokta Mt. Hagen

Pe Bilong Baim Meri

Dia Edita — Plis yupela inap lusim liklik spes, long putim wari bilong mi i go insait?

Yes, mi save lukim ol papa na mama bilong ol pikinini meri i save dia tumas. Long wanem tru? Meri i no save wokim wanpela bikpela wok? Em bilong sindaun tasol long haus, na kukim kaikai wasim laplap, kap na lukautim pikinini tasol.

Em i no inap tru long mekim wanpela bikpela wok long ples bilong mi. Plis tru mi save lukim planti tru i save mekim long hap bilong Yangoru, na ol man meri bilong ples Balmo viles em long ap bilong Yangoru

sup-provins.

Sapos yu wanpela man yu inap tru mani olsem K1,500.00 yu ken marit, long dispela ples. Mi ting dispela kain mani? Em bilong baim seken han ka. Mi ting i no gutpela long mi.

Michael Simbiken P.H.D. Arawa Not Solomos Provins.

Senisim Nem Bilong Provinsal Gavman.

Dia Edita — Mi laik bai yu givim liklik spes long Wantok Niuspepa. Mi laik autim wanpela toktok bilong mi long dispela nem. "Sandaun Provinsal Gavman long West Sepik Provins.

Dispela nem Sandaun Provinsal Gavman i no gutpela tumas, mi laik ol i mas kolim Wes Sepik Provinsal Gavman. Mi laik askim wanpela askim long Premia bilong West Sepik Provins Mr. Jacob Talis na askim bilong mi i go olsem: Yu save lukim san i save go daun long Vainimo o we?

Sapos san i save go daun long Vainimo, emi orait yu ken kolim Sandaun Provinsal Gavman, na sapos san i no go daun long Vainimo orait yu no ken kolim Gavman bilong yu long Sandaun Provinsal Gavman.

Sapos yu i stap long Daru insait long Western Provins o Kikori insait long Gulf Provins, yu sanap long nambis bai yu lukim san bai go daun long solwara stret.

Mi yet bin i stap long Daru 3-pela yia olgeta na Kikori long Gulf Provins 1 yia 8 mun, mi save lukim olgeta taim san i save go daun long solwara stret na san i no go daun long Vainimo.

Ating Jacob Talis yu mas senisim nem bilong Gavman bilong yu. Dispela nem Sandaun ol Western Provins ol i yusim bai i orait long wanem san i save go daun long Daru stret.

Na yu husat man i laik sapatim mi, rait tasol i go na mi ken lukim. Tenkyu.

James K. Manjaban, Angoram, E.S.P.

GILLETTE Mekim Wasket Bilong Yu i Lait Moa



Bai yu luk klin na smat



Dispela kaparesa i go, i go, i go na i no lusim sap bilong em kwik





LO BILONG YIA 1963 – 1973 BILONG BOSIM OL LAISENS BILONG STRONGPELA DRING

TOK SAVE LONG OL EPLIKESEN I BIN KAMAP

Bilong bihainim olgeta tok bilong Lo bilong yia 1963 – 1973 bilong bosim ol laisens bilong strongpela dring, mipela i tok save hia olsem: bai mipela i putim kibung long wan wan provins na distrik bilong skelim eplikesen bilong ol pipel i putim nem bilong ol long dispela pepa. Bai mipela i makim de na ples bilong dispela wan wan kibung long wan wan distrik.

HUSAT I APLAI	WANEM KAIN EPLIKESEN	WANEM KAIN LAISENS	PLES
IS NU BRITEN PROVINS			
VINCENT KAMANAGUA (UPM KLAP)	Nupela Eplikesen	Klap	Mangenuna Viles, Rabaul
MICHAEL JOEL	Nupela Eplikesen	Stuakipa	Vunagogo Viles, Tomaringa
IS SEPIK PROVINS			
JOHN HANGU (POIN BISNIS GRUP)	Nupela Eplikesen	Klap	Paparon Viles
PEPET NAWAGEN & FRANCIS NANGU	Nupela Eplikesen	Stuakipa	Kanganamun Viles, Katolik Misin Kapai – Mari
MADANG PROVINS			
BALA KOMUNITI KLAP	Nupela Eplikesen	Klap	Bangame Viles, Madang
AMAKO KLAP	Nupela Eplikesen	Klap	Korak Viles, Madang
BARDON KLAP	Nupela Eplikesen	Klap	Bunapak Viles
MAKAK KLAP	Nupela Eplikesen	Klap	Karkar Ailan
KAUL KOMUNITI KLAP	Nupela Eplikesen	Klap	Kaul Viles
WAGAI DOG SPOTS KLAP	Nupela Eplikesen	Klap	Pot. 236 M/I Uluwan
WASEBA KLAP	Nupela Eplikesen	Klap	Talai Viles, Bogia
SIMBAI SPOTS & SOSAL KLAP	Nupela Eplikesen	Klap	Simbai Viles, Madang
APA KANAKAU	Nupela Eplikesen	Klap	Rempi Viles
LABAHA KLAP	Nupela Eplikesen	Klap	Motonace Not Cos Rot
BADI SASHAN (YUKU SOSOL KLAP)	Nupela Eplikesen	Klap	Bilia Mainlan
NOT GALAK KLAP	Nupela Eplikesen	Klap	Tep Tep Patrol Pos
HAMNAKAL KLAP	Nupela Eplikesen	Klap	Rempi Bomase Viles
I.D. SEG SOSOL KLAP	Nupela Eplikesen	Klap	Vidar Poin, Vidar
NIUGINI MADANG TRADING PTY. LTD.	Nupela Eplikesen	Stuakipa	Walapat Viles
BOB DAK	Nupela Eplikesen	Stuakipa	Efu Viles
NOT SOLOMON PROVINS			
PAUL SIBUNA (PANUI KLAP)	Nupela Eplikesen	Klap	Kinarui Viles, Konga Siwai
“T” WANDERS SOSAL KLAP	Nupela Eplikesen	Klap	Tupipisau Viles, Buin
OMALA SOSOL KLAP	Nupela Eplikesen	Klap	Lopele Viles, Nagovisi
PETER SOUE	Nupela Eplikesen	Stuakipa	Kiros Viles, Boku
MATHEW OBERD	Nupela Eplikesen	Stuakipa	Dahwon Viles, Tinputz
SAUTEN HAILANS			
SOI-SESSU BISNIS GRUP	Nupela Eplikesen	Stuakipa	Nipa Taunsip, Komesal Sait Namba 1
MUNI BISNIS GRUP	Nupela Eplikesen	Stuakipa	Tindua Viles, Pangia
KOMIA YAKOP GRUP	Nupela Eplikesen	Stuakipa	Komia Viles, Mendi

Dated at Waigani this Twenty Ninth day of October, One Thousand Nine Hundred and Seventy Nine.


WILLIE TAUGAU,
 Chief Licensing Commissioner.

KAUNSI LA TRAIM



HE OL WANTOK... MASKI TOKTOK NA MAUSWARA PLANTI. EM I NO SAVE MEKIM SAMTING KAMAP. YU MAS GO TRAIM NA MEKIM.

WOKIM STRONGPELA HAUS



BAI MI HELPIM YU. MI KEN SOIM YU LONG WOKIM STRONGPELA HAUS TU.

TRAIM, BAI MI WOKIM NUPELA HAUS. DIWAI BILONG DISPELA HAUS I STING PINO NA I BREK FONDAUM.



TENKYU TRAIM.

NAMBAWAN SAMTING EM LONG PAINIM STRONGPELA DIWAI I KEN I STAP LONGPELA TAIM TRU.



BAI YUMI KISIM OL DIWAI I GO LONG FORES DIPATMEN NA BAI KISI OL MARASIN BILONG KILIM DAI OL BINATANG.



BIHAIN TAIM.

YUMI PUTIM MARASIN PINIS. NAU YUMI KEN STAT LONG WOKIM HAUS.

DIWAI BAI STING KWIK TAIM SAPOS EM WET UL TAIM YUMI MAS WOKIM HAUS OLSEM BAI DIWAI NO KEN WET LONG TAIM BILONG REN.


EM BAI ISI TASOL LONG KARAHAPIM HAUS WANTAIM BINPELA TAUNAM... HA... HA!



NO KEN TOKTOK PLANTI MAUSWARA, YU KAM HELPIM MITUPELA.

TRAIM, LONG WANEM YU PENIM AS BILONG DIWAI WANTAIM KOLTA?

TAIM EM STAP INSAIT LONG GRAUN EM NO KEN STING KWIK TAIM.



ARERE I ORAIT, TASOL HET BILONG DIWAI STAP ARASAIT BAI WET KWIK TAIM. DISPELA AIN HAT BAI LUKAUTIM NA EM BAI NO KEN WET.



I GAT PLANTI HUL LONG FLUA YA!

EM ORAIT, TAIM EM REN, BAI WARA I GO AUT KWIK TAIM LONG HUL. DIWAI TU BAI STAP DRAI NA TU BAI STAP LONGPELA TAIM MOA.



RUF BILONG HAUS I KAM AUTSAIT LONGWE TRU YA!

BIKPELA RUF INAP STOPIM REN LONG HOLIMPAS LONG BANE..

... OLSEM BAI DIWAI NO KEN STING KWIK, TRU TRAIM!?

EM TRU.

KAUNSI LA TRAIM
U.S.P.A.T.F.
P.O. BOX 6987
BAROKO

LAIP LAIN

Mi no inap sindaun gut long ples

olkain nupela na nais-pela samting.

Ol i laik bai mi baim wanpela trakta na kirapim bisnis bilong groim sayor na olkain samting ol i ken salim long maket, na long dipatmen bilong gavman i save baim ol dispela kain kaikai. Ol i no save, Bipo mi ken kirapim bisnis, mi mas gat mani. Ol i ting, bikos mi skul pinis, em i isi tumas long go painim mani. Na bihain mi painim pinis, orait, nau ol tu i laik insait wantaim mi na helpim mi.

Tasol sapos mi no gat sampela mani, beng tu i no laik givim dinau long mi. Ating i gat sampela arapela pasin o ples bilong kisim dinau?

Dia Laiplain,

Long wik i go pinis, yupela i bin prinim pas bilong wanpela yangpela man i gat sampela wari bihain long em i bin pinisim haiskul. Laiplain i bin skulim em long pasin bilong painim wok, na bilong stap long taim long dispela wok.

Tasol em i rait, em i bin painim wari long viles tu. Em i tok olsem: Mi laikim tumas long sindaun i stap long ples, tasol mi no inap. Mi no inap long kamap wantingting wantaim ol wantok long ples. Ol i save ting, olgeta man i skul pinis, i mas kisim isi tumas



Dia Pren,

Yu tok yu no painim isi long sindaun gut long ples. Bilong wanem nogat?

Nogut yu hambak long skulsave bilong yu. Planti skulboi i

save mekim olsem na ol bikpela manmeri bilong ples i no laik. Yu semim ol olsem.

Sapos sampela taim yu harim ol lapun na bikpela manmeri i mekim kranki toktok, yu no ken krosim ol. Yu no ken lap long ol.

Nogat. Yu yangpela yet. Bai ol i no laik; bai ol i kros. Sapos ol kranki aidia bilong ol inap long bagarapim arapela man, orait, yu ken kirap na traim stretim save bilong ol. Tasol yu mas lukaut gut, yu skulim ol olsem wanem.

Yu yet i bin givim wanpela eksampel. Ol pipel i ting, bikos yu winim haiskul pinis, yu inap statim wanpela bisnis isi tumas. Yu save pinis, dispela tingting bilong ol i kranki. Tasol bai yu stretim olsem wanem?

Pastaim yu mas painim wanpela man long ples long helpim tingting bilong yu. Yu mas painim wanpela man i gat gutpela save na tingting. Ating em i wanpela tisa o wanpela sios lida o kain man olsem. Em i gat namba na em inap long strongim tok bilong yu.

Na yu askim tu, sapos i gat arapela we bilong kisim dinau bilong statim wok bilong yu. Yesa, i gat. Gavman i gat wanpela samting ol i kolim Viles Ekonomik Developmen Fan. Tasol em tu bai helpim yu, sapos ol man bilong ples i givim mani o wok o graun o sampela haus samting bilong statim wanpela wok.

Long pas bilong yu, yu tok olsem, ol pipel i laik yu baim trakta pastaim. Na bihain bai ol i putim sampela mani insait long dispela wok.

Sori. Dispela kain aidia i kranki. Olgeta beng i strong long dispela samting: Ol pipel i mas putim mani bilong ol i go insait pastaim. Beng i lukim, na nau em tu i dabolim mani bilong ol.

Tasol sapos ol wanples i laik bai yu statim dispela wok gaden bilong groim ol sayor samting bilong maket, Rural Developmen Ofisa long hap bilong yu i mas lukim gut ples bilong yu, na pasin bilong yu na bilong ol pipel. Bihain em i ken skelim, na em i ken autim tingting bilong em. Beng i hangamap long ripot bilong em. Olsem mobeta yu go toktok wantaim dispela Ofisa pastaim. Em inap givim yu sampela gutpela aidia na helpim tingting bilong ol. Na tu em i ken toktok wantaim ol pipel.

Aborijini Wokim Stadi

Wanpela Aborijini tisa bilong bikbus long Australia i kam pinis long PNG. Em bai i stap long PNG long wan mun olgeta. Em i laik lukluk long ol we ol liklik skul bilong yumi long ples i save helpim ol komuniti klostu long en.

Nem bilong tisa hia em Charles Manydjarri. Mista Manydjarri i kam long wanpela liklik ailan ol i kolim Milingimbi. Dispela ailan i stap 300 mail longwe long Darwin, biksiti bilong Noten Teritori. I gat 800 man meri olgeta i stap long Milingimbi.

Mista Manydjarri i stat pinis long lukluk insait long Sauten Hailans Provins long Trinde long wik i go pinis. Em i bin lukluk insait long Mendi, Tari na Nipa.

Mista Manydjarri i tok planti ol trabel

na wari bilong yupela hia long PNG i wan-kain tru long ol wari na hevi mipela ol Aborijini i painim long Australia.

Mi stap hia long lukluk long ol we ol pipel bilong PNG i wok long stretim ol kain wari olsem.

Mi laik painim autim ol we ol skul insait long PNG i wok-long helpim komuniti bilong ol.

Mista Manydjarri i tok long ples bilong em ol liklik skul pikinini i save yusim tokples bilong ol inap long Gred 5. Long dispela gred tasol ol i save bringim Inglis i go insait long skul. I gat 335 studen olgeta long Milingimbi. Long dispela skul i gat ol kain kain skul. I gat skul bilong ol liklik manki i no inap go long skul tru. I gat skul bilong ol primari manki na ol hai skul manki. Na tu i gat sampela kos bilong ol bikpela man na meri yumi kolim Adalt Edukesen.

Mista Manydjarri i bin wok olsem tisa inap 25 yia olgeta. Em i memba bilong kaunsil long ples bilong em. Em i save stadi tu long ol we bilong raunim wok bilong Lokal Gavman.



Mista Charles Manydjarri

A.R. Rumber

Man Kamap Meri

Long bipo-tru i gat wanpela ples i stap long dispela taim tok bilong God i kamap, na dispela ples nem bilong em Molom long hap bilong Markham.

Long dispela ples olgeta Sande ol i save Lotu long Sande, na wanpela man nem bilong em Guwos. Em i no save Lotu long Sande na meri bilong em na pikinini tasol i save go lotu; na Guwos oltaim em i save go painim abus long San-

de na meri bilong em i save krosim em long go Lotu long Sande ol taim.

Wanpela Sande moning Guwos i kirap na i kisim Bunara na (sup-sup) Spia na em i go long bus long painim abus. Em i go na em i lukim traipela kapul i sindaun i stap, na em i go isi tru na i taitim bunara long sutim kapul. Kapul ya i tanim na i tokim em. Hai yu no ken sutim mi sapos yu sutim mi bai wanpela samting bai i

kamap long yu na Guwos i tok, yu giaman yu abus bilong me.

Em nau man ya i lusim spia i go nau na sutim kapul, kwik taim man i kamap olsem wanpela yangpela meri pinis, na susu i sanap i senisim pinis olsem meri.

Orait taim em i kam bek long ples meri bilong em i lukim em na em i tok, hai yu dispela meri yu kam long wanem na em i tok, nogat em mi ta-



sol mi kam olsem meri pinis na nau ol i stap long wanpela haus tasol.

Em tasol tumbuna stori.

Elisah P. Benny, Markham, Morobe Provins.



EM I NAMBAWAN RESA LONG PAPUA NIUGINI



Wilkinson Sword em i namba wan resa tru. Maski sapos mausgras i bikpela o liklik. Em i ken sevim gut tru. Resa ya i no save ros. Em i resa bilong PNG stret.

Wilkinson Sword Resa em i strongpela ain tru. Tit bilong en i sap moa yet. Em i namba wan resa long PNG.



The name on the world's finest blades.



Devit I Winim Ol Filistia

2 Samyuel 5:7-22



NAU BAI MI MEKIM JERUSALEM I KAMAP BIKTAUN BILONG MI. YUELA HARIM NA BAI YUELA KEN SINDAUN GUT NA STAP BEL ISI WANTAIM MIPELA.



OL I BIN NEMIM DEKIT KING BILONG OL ISREL. NA NAU EM I KISIM PINIS JERUSALEM.

BAI YUMI MEKIM WANEM SAMTING?




I GAT WANPELA ROT TASOL BILONG PINISIM EM.

YUMI MAS PAIT NAU. NOGUT YUMI WETIM EM I KAMAP STRONG TRU.

DEVIT I HARIM NIUS LONG OL FILISTIA I KAM BILONG PAIT WANTAIM EM. OLSEM NA DEVIT I TOKTOK WANTAIM HETPRIS LONG ASKIM GOD BAI OL I MEKIM WANEM SAMTING.

OL FILISTIA I PASIM TOK LONG WE BILONG PAIT WANTAIM OL ISREL NA OL I KIRAP I GO LONG JERUSALEM.



GOD I TOK BAI EM I HELPIM OL. OLSEM NA DEVIT I KISIM STRONG NA I GO LUKIM JOAP.


MASKI, GOD BAI I HELPIM YUMI. YUMI HARIAP I GO TAIM OL I NO REDI. NA BAI OL I NO INAP WINIM PAIT.

LUKIM! OL I BRINGIM OL GOD GIAMAN I KAM.

NAU BAI YUMI SOIM OL GOD I GAT BIKPELA STRONG.

Komik hia i kamap pinis long buk. Yu inap balm long olgeta, Kristen Buk Stua.

Used by permission of the David C. Cook Foundation. Copyright 1973, David C. Cook Publishing Co. All rights reserved.



Pater Arnold Jurgen

Kristen man meri bilong PNG i winim pinis planti arapela kristen bilong narapela hap long wanem ol yet i save painim mani long mekim wok bilong God i go het.

Dispela toktok, Fr. Arnold Jurgen, Sekreter Jeneral bilong Wol Biblikal Apostolate insait long Katolik Sios i mekim. Em i mekim dispela toktok, bihain tasol em i harim olsem 140 paris long PNG i bungim K11,000 tausen long tanim Olpela Testamen i go long Tok Pisin.

Fr. Jurgen i tok planti Kristen long arapela kantri i save singaut long Sios tasol long helpim ol long mekim kain wok olsem.

Fr. Jurgen i raun pinis long PNG long lukluk long wanem wok ol sios i mekim long Baibel.

Em i lukluk tu long ol we Katolik Sios i mekim long ol pipel long ritim baibel na save gut long en. Em i toktok tu wantaim Rev. Joshua Daimoi, Sekretari bilong PNG Baibel Sosaiti, na Siaman bilong Melanesian Kaunsil ov Sios.

Fr. Jurgen i tok, wok bilong em bilong helpim Katolik Sios bung wantaim ol arapela Sios long wok wantaim na putim kamap wanpela Baibel. Olsem olgeta Sios i ken yusim.

Em i tok bipo Katolik Sios na ol arapela Sios i no wok wantaim long mekim ol wok bilong baibel i go het.

Tasol nau ol pipel bilong Lutheran, Engliken, Katolik, Yunitet na ol arapela sios i bung wantaim long tanim ol namba tu lain buk bilong Olpela Testamen i go long Tok Pisin.

Ben Skorpio

Sande Lotu

DE BILONG ONAIM JISAS KRAIS I KING

(25 Novemba 1979) (Rit i kam long Jon 33-37).

Long sampela bikpela sios, tude em i las Sande bilong sios yia bilong ol. Long wanem neks Sande em i bigin bilong Adven, em i bigin bilong nupela sios yia. Em i taim ol i stat long redi long Krismas. Long sampela sios tude ol i gat spesel de bilong onaim Jisas Krai i king.

Dispela aidia bilong Jisas Krai i king, em i kam long rit bilong tude. Long stori ya, Jisas yet i bekim tok long Pailat. Pailat i bin askim em stret: "Yu king, a?" Na Jisas i bekim stret: "Yesa. Mi king... tasol kingdom bilong mi i no stap long dispela graun."

I no gat wanpela man i stap long dispela graun, em inap long Jisas. Long wanem, Jisas em i God, i pikinini bilong God. Olsem na em i king. Jisas i God na i gat olgeta strong. I no gat wanpela samting em i no inap long mekim o wokim. Em inap bagarapim tru olgeta i egens long em. Tasol em i no save mekim olsem.

Jisas i king; tasol em i narakain. Insait long kingdom bilong em i nogat graun, i gat ol pipel tasol. Na em i no krungutim ol, o putim hevi long ol, na ol i mas kam insait. Nogat. Olgeta manmeri i stap insait long kingdom bilong Jisas, em ol i stap insait long laik bilong ol yet.

Yes, Jisas i strong olgeta, em inap bosim olgeta samting. Tasol wanpela samting i pasim strong bilong em. Em bel na sol na inap bilong yu. Em i laik bosim spirit bilong yu, tasol em i larim yu yet i opim dua. Em i no brukim dua na kam insait. Nogat. Yu yet, long laik bilong

yu, i mas opim dua long em. Em i lo bilong em.

Tude Jisas i sanap wantaim planti arapela kendidet na i resis long kisim vot bilong yu. Dispela arapela kendidet i resis wantaim Jisas, em yumi kolim Mista Mani, o Mista Biknem, o Mista Hambak, o Mista Pawa, o Mista Pinis Laik. Orait, nau Jisas i go pas na i givim ripot long wok bilong em. Em i lukim stret ai bilong yu, i poinim finga long yu na em i tok olsem: Mi God. Mi yet mi wokim yu. Mi wanpela inap pinisim yu. Inap yu givim vot long mi?

Mi yet mi givim kaikai long yu, kantri long yu, helt long yu, olkain save long yu. Inap yu givim vot long mi?

Mi putim yu long Papua Niugini — na i no long India o Afrika, — we ol i gat planti hangri. Inap yu givim vot long mi?

Mi wari long yu. Mi tingting long yu. Mi bin slaim arapela pipel long kam helpim yu. I no gat wanpela taim mi bin tromoim yu. Inap long yu givim vot long mi?

Mi givim laip bilong mi pinis bilong helpim yu na mekim gut long yu. Inap long yu ken givim vot long mi?

Olabei! Ating ol' arapela kendidet i harim dispela kain tok, na ol yet i givim vot long Jisas. I no gat narapela inap long em. Em i mas win. Orait, em i kisim vot bilong yu. Na em i bosim spirit bilong yu. I tru, o nogat? Sapos i tru, yu mas soim long gutpela pasin na sindaun bilong yu.



Draiva Dia Tumas

Dia Edita — Mi tupela laik autim liklik wari bilong mitupela.

Bilong wanem tru ol draiva i save dia tumas long ka bilong

ol, taim ol Hai Skul sumatin i laik go long ples long taim bilong holide. Mipela ol Hai Skul sumatin i no save sok mani na yupela i dia tumas long ka, bilong yupela, ating yupela ol draiva i spak o ating yupela i tait o olsem wanem n long yupela. Yupela mas tingting gut na kostim ol sumatin long baim ka. Na tu ol i save trikim ol lapunman na meri. Na ating ol draiva i save kisim sampela kina nating long bia na smuk na ol kaikai bilong ol. Mipela save olsem

P.M.V. bilong yupela, tasol yupela mas i no ken dia tumas long ka bilong yupela. Espesili long go long Bogia na Madang rot.

Mipela ol sumatin i stap long Malala Hai Skul na taim bilong holide taim mipela i laik go bek ol draiva i save kostim mipela planti mani.

Em tasol liklik wari bilong mitupela.

Husat draiva o bisnis man o man nating i laik bekim pas o husat studen i laik sapatim mitupela

em i orait tasol. Tenkyu.

Raymond Onga Charles 'Y' Paissi Malala Hai Skul Madang Provins.

Viles Kot Magistret

Dia Edita — Mi laik autim bikpela belhevi, bilong mi na wari bilong mi i go long yupela olgeta Viles Kot Magistret. Em wampela askim bilong mi, i go long yupela.

a) Olsem wanem,

sapos wampela singel man em i go wisil long wampela singel meri. Na i nogat trabel pasin long man na meri. Na sapos meri i go bringim liklik wari bilong em ya, i go long Viles Kot Magistret. Na pulim man i go long kot. Na Viles Kot Magistret i sasim dispela man, na baim meri long K70.00 o nogat?

b) I tru long, lo buk bilong yupela sapos man i wisil tasol long meri, bai em baim meri long (70.00 laka?

Hia long ples bilong mi long Ulau Aitape, W.S.P. Ol Viles Kot Magistret i save putim dispela kain lo na mi pilim bel bilong mi no hamamas.

Olsem na mi laik save lo bilong Viles Kot Magistret long sampela hap provins. Yu husat kuskus o plis bilong Viles Kot Magistret i laik bekim dispela kwesten bilong mi.

Rait tasol i go long Wantok Nius. Mi hamamas tasol long ritim. Tenkyu.

im o hangamapim man husat i kilim narapela.

Em i tru, em i kastom bilong dispela kantri bilong yumi. Em i stap bipo long tingting — na save bilong bekim na kilim arapela long we em i laik.

Tasol nau mi sori tru. Ating long Baibel yumi harim pinis tising bilong Jisas.

Holi Spirit Komyuniti Skul, Madang

Bas Draiva Mekim Wantok Sistem

Dia Edita — Yes, mi laik bai yu givim liklik spes na mi ken putim kamap wari bilong mi. Wari bilong mi i go olsem:

Mi save lukim ol draiva bilong pablik bas i kisim ol wantok bilong ol nating. Ol i no save baim bas, na mipela i save baim bas. Dispela em i no gutpela long wanem, em i no PMV Trak bilong yutupela wantok bilong yu.

Em i bisnis bilong narapela man, na yu stap wokman long en tasol. Mipela olgeta i mas baim bas, na tu bas draiva i mas givim tiket long ol pasindia. Tasol, ol draiva i save givim tiket long sampela pasindia, na sampela pasindia nogat.

Yes, ating i no mi wampela tasol mi lukim dispela pasin. Nogat. Planti pipel tu i lukim dispela pasin, na em i tok giaman nating tasol.

Mi bin stap long Lae inap long 18 yia pinis, olsem dispela pasin i no bilong nau tasol. Nogat. Long taim bipo i kam inap nau, dispela pasin i stap yet.

Long 5 Ogas, mi bin bringim brata i go long ples balus na mi lukim tripela man na wampela meri i kalap long bas nating. Draiva i no kisim mani long dispela lain man na meri. Nogat. Ol i go insait nating tasol.

Em tasol long liklik wari bilong mi. Sapos yu husat wantok i lukim na yu laik sapatim. Orait, rait tasol i go long Wantok Niuspepa, bai mi J.T.O. Tevong, Morobe Provins.

Peter Billy Chimau/Ulau Aitape, W.S.P.

Kaunsil Olsem Kampani

Dia Edita — Plis inap yu givim mi hap spes na mi laik autim wari bilong mi. Wari bilong mi i go olsem.

Mi save lukim olgeta hap ol taun kaunsil ol lokal gavman kaunsil ol i save baim ka o ambulans bilong ol haus sik tasol. Nau mi lukim Kainantu Kaunsil ol kamap olsem wampela bisnis kampani tru na ol i no tingting long pipel bilong ol long Kainantu districk na baim wampela ambulans na givim ol haus sik na ambulans mas kisim sikmanmeri long distrik klostu. Em tasol wari bilong mi na yu. Husat i laik sapatim mi o bekim pas bilong mi, mi wet tasol long lukim Wantok Niuspepa. Tenkyu.

Mr. David A.Y. Kainantu, E.H.D.

Maski Hangamapim Man

Dia Edita — Plis, givim mi liklik spes long mi putim dispela tingting bilong mi i go insait long Wantok Niuspepa. Bai ol arapela pren i ken ritim na kisim sampela save long en.

Yes em ya, long Nesenel Redio mi save harim wari bilong ol bikman bilong yumi long haus i save mekim planti toktok long bekim — na kil-



Long pies i tudak bikos smolpela mun i haitim em, ol snekman nau i kamap na i kirap pait wantaim liklik ami, em Reyna na von Horst i bosim....



Ol horib i laik stilim bek lida bilong ol, em mipela i bin kalabusim Hariap ol Sarian, bihainim mi....



Mipela i traim, Reyna... tasol planti mipela i bin slip taim ol i kamap stil....



Tupela ami i pait strong moa...bikpela krai i kamap long olgeta hap...na ami bilong Reyna isurik nau. i laik lus....




Ol Sarian, yupela taitim bun tru, o yumi olgeta i lus.....



© 1978 United Feature Syndicate, Inc.

'Mi bai pinisim Aba long namba 7 raun' Pedroza



Wol Sempian, Eusebio Pedroza bilong Saut Amerika i tren long redi long dispela bikpela pait wantaim PNG Sempian, John Aba long Novemba 17 long Mosbi.




"Mi no inap putim nem bilong PNG i go daun. Mi bai trai hat tru long kisim dispela Wol Taitel, long Eusebio Pedroza". John Aba i soim masel bilong em na singaut. Em i mekim long haus bilong tren long 6 mail Pot Mosbi.

BOROKO MOTORS

SAPOS YU GAT WOK-TINGIM FORD



Yu ken lukim nupela FORD TRAKTA long BOROKO MOTORS long olgeta hap bilong Papua Niugini. Na tu yu ken baim long Arawa Motors, na Sepik Engineers, na long Kimbe Bay Shipping, na Highlands Heneni Goroka, na Higatura Motors Popondetta.



OL MEKENIK BILONG
MIPELA INAP FIKSIM
FORD
LONG OLGETA HAP

*Mipela i gat planti spea pat na mekenik.



John Aba i trenim lek bilong em long skipping rop. Aba i tren olgeta de stat long 6 kilok apinun inap long 8 kilok. Long Sarere 17 Novemba em bai kalap kalap i stap long boxing ring na traim abrusim han bilong Pedroza.

Wantok Spot

'Mi no inap daunim nem bilong PNG' Aba

Sempian Boxa bilong Wol, Eusebio Pedroza bilong Panama Siti long Saut Amerika na Sempian Boxa bilong PNG (na namba 9 long Wol), John Aba bai pait tru long Sarere 17 Novemba.

John Aba bai tra-
im Eusebio Pedroza
long kamap Wol
Sempian long namba
ol i kolim Feda Weit.
Tupela bai pait long
Hubert Murray
Stadium long Mosbi.
Trena na meneja bi-
long Aba, Mista
Norm Salter i ting
moa long 20,000
pipel bai kamap long
dispela pait long
Mosbi.

Eusebio Pedroza i
kamap pinis long
Mosbi long Sande
Novemba 5 na i tren
hat i stap long tu wik
olgeta.

Aba tu i wok long
tren strong moa.
Mark Apai, narapela
Sempian Boxa bilong
PNG i wok long givim
trening pait long Aba
long redi long dispela
pait.

Pedroza i tok, bi-
hain long dispela pait
em i laik kam bek
long trenim sampela
yangpela boxa long
PNG.

Em i tok PNG i
gat plnati gutpela
boxa tru i stap na em
i laik kam bek na
helpim ol save moa

long box.


Aba i tok, em bai
traim nokim na pinis-
im tru Pedroza long
namba 7 raun.
Eusebio Pedroza tu i
tok em bai nokim
Aba aut long namba
7 raun. Tupela bai
pait i go inap 15 raun
stret, sapos wanpela i
no pinisim arapela
namel long pait.
John Aba i tok em
bai winim tru dispela
pait. "Mi no inap
putim nem bilong
PNG i go daun."

Bipo long dispela
bikpela pait, boxa,
Mark Apai na Kusak
Kamanak bai pait
wantaim tupela boxa
bilong Australia.



Man long referi o
lukautim dispela pait
em i Hendrick Kris-
tobula, wanpela save
man tru bilong luk-
autim Boxen na em i
bilong kantri, Saut
Afrika.

Tupela Jas bilong
bikpela pait em
Humberto Figeroa
bilong Panama long
Saut Amerika na
Steve Lewis bilong
PNG.

Ben Skorpio



Stev Beli bilong Gordons Police Boxing Klap i tromoim hansut bilong em i go long Pedroza, tasol Pedroza, i wok long mekim hat long han bilong Stev long kisim pes bilong em. Steve i wanpela long ol boxa husat i givim trening long Eusebio long redi long dispela bikpela pait long Sarere.



'Pedroza aut long 7 raun' Aba

AIR NIUGINI

HELPIM KANTRI GOHET

THE NATIONAL AIRLINE OF PAPUA NEW GUINEA



Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.